

Ս. ԾՆՆԴՅԱՆ ՏՈՆԸ ԱՆԳԵՂԱԿՈԹԻ Ս. ԱՍՏՎԱԾԱԾԻՆ ԵԿԵՂԵՑՈՒՄ

Սյունիքի փոխառաջնորդությունից ներս Սիսիանի Անգեղակոթ գյուղի Ս. Աստվածածին եկեղեցում (ԺԲ դար) մեծ հանդիսավորությամբ և առաջին անգամը լինելով՝ վերջին 80 տարիների ընթացքին, տոնվեց մեր Տեր Հիսուս Քրիստոսի Սուրբ Ծննդյան և Աստվածահայտնության հրաշափառ տոնը:

Բացի Անգեղակոթի բնակչությունից ներկա էին նաև Սիսիանից, Գորիսից և մոտակա գյուղերից եկած ուխտավորներ ու հարյուրավոր հավատացյալներ, ինչպես նաև տեղական իշխանությունների ներկայացուցիչներ, Ազգային ժողովի պատգամավոր Հովիկ Ագոյանը, Սիսիանի քաղաքապետ Լավրենտի Սարգսյանը և ուրիշներ: Սիսիանի հոգևոր հովիվ Արժանապատիվ Ս. Գրիգոր քահանա Հովսեփյանի մատուցած Ս. Պատարագի և Ջրօրհների հանդիսավոր արարողությունից հետո, օրվա խորհրդին նվիրված քարոզ խոսեց և իր պատգամը ներկաներին ուղղեց Սյունիքի փոխառաջնորդ Հոգեշնորհ Ս. Աբգար աբեղա Հովակիմյանը: Հայր Սուրբն իր խոսքում հորդորեց առավել նախանձախնդրությամբ ու նվիրումով լծվել իրենց գյուղի եկեղեցաշեն աշխատանքներին ու հավատարիմ մնալ մեր նախնյաց թողած հարուստ ժառանգությանը՝ դրանով իսկ նպաստելով մեր Սուրբ Եկեղեցու զորացման նվիրական գործին:

Խաչի կնքահայրն էր երիտասարդ գործարար Հովակիմ Մնացականյանը:

Հավարտ Ս. Պատարագի Հոգեշնորհ Հայր Սուրբն Արժանապատիվ Ս. Հակոբ և Ս. Գրիգոր քահանաների ու սարկավագաց դասի հետ կատարեց մատաղի օրհնություն, որն այնուհետև եկեղեցու բակում բաշխվեց ներկա հավատացյալներին, ապա կեսօրից հետո Սիսիանի քաղաքապետի և Խաչի կնքահոր կողմից կազմակերպվեց հյուրասիրություն:

ԴԻՎԱՆ ՍՅՈՒՆՅԱՅ ԹԵՄԻ ԱՌԱՋՆՈՐԴԱՐԱՆԻ